

南  
漣  
桔  
語

序

著書體例逮典午而益歧傅子一書至百二十卷之多卽孔  
衍所撰述亦百餘萬言之多下至明堂孔穴之圖洛陽宮殿  
之簿誇多鬪巧蕪陋極矣其間最名博洽者祇張茂先干寶  
數人已耳南齊王儉因爲七志彙之分經典諸子文翰軍書  
陰陽術藝圖譜等目梁阮孝緒又爲七錄一經典二記傳三  
子兵四文集五伎術六佛七道然儉書淺近阮錄不經隋志  
均力詆之叔起同年今之張司空于常侍也是編乃平日隨  
筆所綴不名一門其徵引瑰奇類多俗儒未見之籍其證佐  
精審不爲調人兩可之詞在通齋各種中此其尤勝已抑又  
聞之叔起之守高也始與將軍崑壽戮劇寇陳金釭而拔其  
城迫將軍行叔起以計擒斬金釭僞太尉李可中高民歡然

如再生如旱極而雨其去也攀號呼戀之聲數十里不輟甫  
至潮潮人曰此殺陳金釭者也恃君爲長城其豐順境中樟  
樹凹諸山君悉塹斷之及汪海洋黨棄梅州自小路趨言嶺  
關賴山徑先斷失道不得出遂乞降其權廣州及提刑也判  
牘決事細如牛毛寓目輒不忘吏無敢溷君者文學政事叔  
起蓋兼有之非專壹於咕畢不知權度之輕重短長者余與  
君同譜卅載又同里居相近故知之也詳丹徒李承霖

自序

歲商橫由郡城丁家街徙南河下里面城而居漕渠一綫如帶繚其外戲自目爲南溥翁云階除巨石人立羅生松桂桐篠之屬濃青淺黛浸人衣背風晨雨夕琤琮作響瑟音其後別有連篠數椽地亦幽潔園隸移植若榴罌粟紅藥甘蕉均楚楚有生趣與客箕坐鄙繚岸巾據梧高譚務罄其說而後已然儒墨相糅齟差疊見錯雜靡次軒輶或乖此孫卿子所謂桔耳第山澤之叟戴其蒿簪河濱之兒腰其苦瓠姑且錄之云爾江都蔣超伯敘

五十自述

通齋居士

少年通悅世情疎結習於今一未除嬾向蠅須營別館肯從

鼠壤覓餘蔬安心只鍊無求訣養目慵披有注書若問半生

歟歷壯略同甌北暨淵如予曾直樞府曾守廣州與甌北先生同曾任秋曹曾權臬事與淵如

先生同

夢中歷歷舊巢痕幾歲簪毫右掖門臺省趨蹌雙鬢禿弟兄

凋喪一身存虛名速謗曾何益套語知非且漫論一事邇來

差快意酒杯新得漢臯尊

陰陽度數兩俱歧正是將尋柱下時孔子行年五十有一而不聞道南之沛訪老聃

見莊溲落形骸明鏡笑陸沈心事槁梧知尙羞錄錄趨牛後

何忍頻頻逐鷗斯豈有朱坡狂杜牧低眉長奉沈傳師

俯仰千秋瞬息中太倉一米孰雌雄拈毫偶作鯁鯁賦閉口

差談蟻蠓功悶極着靴行曠野狂來操管問虛空赤松漫以  
延年待問舍求田總未工

五祖演云將須彌山作一管筆  
向虛空作祖師西來意五字

南齊書卷之一

江都蔣超伯輯

羿禹並稱

淮南子堯之時十日並出焦禾稼殺草木而民無所食獫狁  
鑿齒九嬰大風封豨脩蛇皆爲民害堯乃使羿誅鑿齒于疇  
華之野殺九嬰于凶水之上繳大風于青邱之澤上射十日  
而下殺獫狁斷脩蛇于洞庭擒封豨于桑林萬民皆喜置堯  
以爲天子于是天下廣狹險易遠近始有道里舜之時共工  
振滔洪水以薄空桑龍門未開呂梁未發民皆上邱陵赴樹  
木舜乃使禹疏三江五湖關伊闕導滎澗平通溝陸流注東  
海洪水漏九州乾萬民皆甯其性是以稱堯舜以爲聖由是  
觀之則羿功與禹相等此堯時之羿非有窮后羿也

左慈

神仙傳東吳徐墮有道術居丹徒左慈過之墮門下有賓客車牛六七乘欺慈云徐公不在慈知客欺之便去客卽見牛在楊樹杪行適上樹卽不見下卽復見行樹上客報徐公有一老翁眇目吾見其不急之人因欺之云云公不在後須臾牛皆如此不知何等意公曰咄咄此是左公過我汝曹那得欺之又云葛元字孝先從左元放受九丹金液仙經章懷於慈傳注未引此二條特爲錄出

鑪竈也

後漢書左慈傳後操出近郊士大夫從者百許人慈乃爲齋酒一升脯一斤手自斟酌百官莫不醉飽操怪之使尋其故行視諸鑪悉亡其酒脯矣操懷不喜因坐上欲收殺之章懷



太子承史記相如傳注之誤云鑪猶肆也殊不知鑪卽竈耳爾雅釋言煇煇也註今之三隅竈疏若今之火鑪也行視諸鑪謂起視從者所攜一切煇竈若遠在市肆豈能頃刻間行視徧竈

### 三老

章懷太子後漢書明帝紀注引孝經援神契曰尊事三老父象也宋均注老人知天地之事者五更老人知五行更代事者漢官儀三老五更皆取有首妻男女全具者續漢志養三老五更先吉日司徒上太傅若講師故三公人名用其德行人耆高者三公一人爲三老次卿一人爲五更超按永平中充此選者李躬桓榮明帝詔曰三老李躬年耆學明五更桓榮授朕尙書詩曰無德不報無言不酬其賜榮爵關內侯食

邑五千戶三老五更皆以二千石祿養終厥身建初中充此  
選者伏恭馮魴伏恭傳建初二年肅宗行饗禮以恭爲三老  
馮魴傳建初三年以老病乞身肅宗許之其冬爲五更此外  
則袁逢嘗爲三老見袁安傳李充年八十八以爲國三老安  
帝嘗特進見見李充傳楊統位至光祿大夫爲國三老年九  
十卒見楊厚傳士孫瑞爲國三老光祿大夫每三公缺楊彪  
皇甫嵩皆讓位於瑞見王允傳與逢充統瑞同時爲五更者  
蓋不可考充僅郎將似不必定用三公充曾因婦離間白母  
出之亦不必定有首妻也三老又稱三德大戴禮曾子本孝  
篇任善不敢臣三德盧辯注三德三老也

劉佺

後漢書馬援傳二十四年武威將軍劉佺擊武陵五溪蠻夷

深入軍沒光武帝紀則云武陵蠻叛寇掠郡縣遣劉尚討之戰于沅水尚軍敗沒但其事在二十三年爲小異耳尚亦建武中名將後漢書巴郡蠻傳建武二十三年南郡澠山蠻雷遷等始反叛寇掠百姓遣武威將軍劉尚將萬餘人討破之滇王傳云建武十八年夷渠帥棟蠶與姑復櫟榆桤棟諸種反叛殺長吏益州太守繁勝與戰而敗退保朱提十九年遣武威將軍劉尚等發廣漢犍爲蜀郡人及朱提夷合萬三千人擊之尚軍遂渡瀘水入益州界二十年進兵與棟蠶等連戰數月皆破之明年正月追至不韋斬棟蠶帥凡首虜七千餘人諸夷悉平又光武帝紀十九年越嵩太守任貴謀反劉尚襲貴誅之以邛都夷傳攷之緣尚路由越嵩貴聞之疑卽聚兵起營臺招呼諸君長多釀毒酒欲以勞軍因襲擊尚尚

知其謀卽分兵先據邛都掩貴誅之徙其家屬于成都當時  
越嶲滇池皆尙一人戡定襲斬穀王任貴其功尤偉故尙沒  
而伏波慷慨請行也任貴邛都夷傳作長貴

### 段志

與馬伏波同定交南者有樓船將軍段志

見後漢書南蠻傳

與蒙恬

同築長城者有秦將楊翁子

淮南子人間訓秦皇按錄圖見其傳曰亡秦者胡也因發兵五

十萬使蒙公楊翁子將築修城高誘注蒙公蒙恬楊翁子亦秦將

與李冰同導蜀江者有王

益與大撓同定歷法者有鬼臾區大凡駿烈豐功斷非一手

一足所能辦也

與趙雲同列名亞子龍者有征西將軍陳到三國志無傳僅見楊戲輔臣贊

### 人螭

崔琦外戚箴甲子昧爽身首分離初爲天子後爲人螭章懷  
太子注甲子日紂衣其寶衣赴火而死武王乃斬以輕呂之

劍也又引左傳杜預注螭山神獸形以比紂之惡超按螭當作蚩蓋螭古作离與蚩字相似而訛後爲人蚩謂後爲人所輕侮廣韻蚩輕侮也後漢書明帝詔自今若有過稱虛譽尙書皆宜抑而不省示不爲諂子蚩也又華嶠書崔瑗救妻子曰無爲諸子所蚩是其證也

### 關雎

謂關雎之詩意在于刺者凡二家韓詩則主應門失守之說原本緯書後漢書明帝詔云昔應門失守關雎刺世飛蓬隨風微子所嘆章懷太子注引春秋說題辭曰人主不正應門失守故歌關雎以感之宋均注曰應門聽政之處也言不以政事爲務則有宣淫之心關雎樂而不淫思得賢人與之共化修應門之政者也薛君韓詩章句曰詩人言雎鳩貞潔慎

匹以聲相求隱蔽于無人之處故人君退朝入于私宮后妃御見有度應門擊柝鼓人上堂退反宴處體安志明今時大人內傾于色賢人見其萌故詠關雎說淑女正容儀以刺時馮衍顯志賦云美關雎之識微兮愍王道之將崩此一說也魯詩則以爲刺康王晏朝之詩前漢書杜欽傳云佩玉晏鳴關雎嘆之注李奇曰后夫人雞鳴佩玉去君所周康王后不然而故詩人嘆而傷之臣瓚曰此魯詩也又後漢書皇后紀序云故康王晚朝關雎作諷宣后晏起姜氏請愆注仍用前書音義並云見魯詩此又一說也至張超誚青衣賦云周漸將衰康王晏起畢公喟然深思古道感彼關雎性不雙侶願得周公妃以竊窈防微消漸諷諭君父孔氏大之列冠篇首則不但以爲刺康王並定爲畢公作矣

近代經聚訟臆說橫生如朱謀瑋詩故以小

星爲替御入直之詩何楷指舒窈窕兮爲夏徵舒以草蟲爲  
南陔以菁菁者莪爲由儀以繒蠻爲崇邱嚴虞惇據左氏祭  
仲有寵于莊公指爲安陵龍陽之流以山有扶蘇之狡童當  
之謂仲雖爲卿詩人醜其進身之始陸奎勲謂燕燕爲衛君  
悼亡之作謂邱中有麻之子國爲鄭武公字其子嗟當作子  
多爲鄭桓公字謂小明之共人爲二相共和謂鼓鐘爲穆王  
作而淑人爲盛姬諸錦以僖負羈之妻證季女斯飢似此甚多不可枚舉

### 雷擊人

郭青螺謂雷之擊人皆治其宿生之業此小說中語非儒者  
之言也按京房易傳云小人不義而反尊榮則虎食人辟歷

殺人亦象暴政

見蔡邕傳三事注  
郎中張文疏語

### 里語

畫虎不成反類狗畫龍不成反類狗皆漢時里語惠氏補注  
于畫虎類狗下引漢律曰捕虎一購錢三千其狗半之捕豺  
一購錢百爾雅釋獸曰熊虎醜其子狗也意謂畫虎類狗之

狗爲虎子也如是則孔僖傳畫龍不成句作何解乎狗爲賤畜所以鄰房生告崔駰及僖誹謗先帝惠氏于伏波傳援引漢律失之泥矣

伊尹

後漢書馮衍顯志賦昔伊尹之干湯兮七十說而乃信皋陶釣于蠶澤兮賴虞舜而後親章懷太子注伊尹名摯負鼎俎以干湯七十說而乃信謂年七十說湯乃得信也信音申韓詩外傳伊尹故有莘氏僮也負鼎操俎調五味而立爲相又楚詞天問緣鵠飾玉后帝是饗王逸注后帝謂殷湯言伊尹始仕緣烹鵠鳥之羹修玉鼎以事于湯湯賢之遂以爲相凡此等說皆近不經然尹語云甘而不飴肥而不饁二語精極千古知味者莫如尹

傳休奕瓜臠食之不飴用尹語也



同年

三國志吳步騭傳與廣陵衛旌同年相善注引吳錄曰旌字子旗官至尚書其後騭督西陵條列諸葛瑾陸遜等及衛旌李肅十一人行狀則旌亦當時名士廣陵耆舊也古以同歲生者爲同年又見周瑜傳注

江表傳權母曰公瑾與伯符同年小一月耳我視之如子也

山亭

錢大昭後漢書補表山亭鄉侯蔣澄建武時封陽羨西亭侯

蔣通

澄之子

亦建武時封

大昭係據咸淳毘陵志

凡江南蔣氏皆出山亭

吳時蔣修名與虞仲翔相亞孫登臨終疏云蔣修虞翻志節

分明見吳主五子傳楚粵諸蔣則恭侯之胄也

蜀志恭侯琬傳云零陵湘

鄉人

山亭侯碑乃唐天寶中裔孫冽建至宋時之奇登侍從之

翰守蘇州又重立焉自宋以來吳中之蔣分爲三派一居長

洲一居常熟一居宜興明季兵興土寇蜂起六世祖自常熟

來揚僑寓以廖家湖東水深土厚遂定居云

公有隱德土人愛之名所居爲

蔣家壩

### 來敏

裴松之蜀志來敏傳注引諸葛亮教云將軍來敏對上官顯

言新人有何功德而奪我榮資與之耶諸人共憎我何故如

是敏年老狂悖生此怨言昔成都初定議者以爲來敏亂羣

先帝以新定之際故遂含容無所禮用後劉子初選以爲太

子家令先帝不悅而不忍拒也後主卽位吾聞于知人遂復

擢爲將軍祭酒違議者之審見背先帝所疎外自謂能以敦

厲薄俗帥之以義今旣不能表退職使閉門思愆按敏家世

三公長于文學傳稱其尤精倉雅善左氏春秋爲當時耆宿

學士卽或語言不節何至目爲狂悖褊哉亮也所以亮卒而李邕上書詆爲身仗強兵狼顧虎視也其後敏與孟光壽俱近百當千戈俶擾之際而成都二老九十不衰可云人瑞矣

### 鹽賦

三國時吳蜀皆資鹽賦吳有司鹽校尉

見孫休傳永安七年

章武亦設

是官蜀志王連傳云遷司鹽校尉較鹽鐵之利利入甚多有裨國用追連遷蜀郡太守興業將軍領鹽府如故利權一而信任專此蜀之所以能立國乎其以典戎之官管牢盆之政隨地巡緝盜無所容尤權時之要策也

晉時以都尉司鹽亦兼武職

### 梓枌

棟謂之梓何平叔景福殿賦雙枚旣修重梓乃飾是已又謂之枌廣韻枌複屋棟也吳志太史慈傳云嘗從策討麻堡賊

賦于屯裏緣樓上行晉以手持樓勢慈引弓射之矢貫手著  
勢圍外萬人莫不稱善

### 高涼

孫吳時高涼不靖盜賊數起三國志陸敬宗傳云高涼渠帥  
黃吳等支黨三千餘家又鍾離牧傳注引會稽典錄云高涼  
賊帥仍弩等破略百姓殘虐吏民又呂岱傳云高涼賊帥錢  
博乞降岱因承制以博爲高涼西部都尉又薛綜疏云今日  
交州雖名粗定尙有高涼宿賊凡此皆高州郡志所漏而未  
述者也

### 蔣氏顯于吳

三國時蔣氏之顯于吳者甚多與虞翻並稱者有蔣修與韓  
當周泰相亞者有蔣欽張溫傳中有蔣康同陸瑁游處者有

蔣纂

通家

魏氏春秋太傅薨夏侯元嘆曰此人猶能以通家年少遇我子元子上不吾容也則漢魏之世已重通家

蓄簪

虞玩之答齊高帝賜新屐云今日之賜恩華俱重但蓄簪弊履復不可遺帝善之簪蓄二字本韓詩外傳也

舌箴

李文饒舌箴伯陽之戒柔存剛缺言貴無瑕辯貴若訥勿以寤一言而取卿相勿以三寸舌而爲帝師徒見婁敬掉而獲爵不知魏其齮而可悲嗟爾君子念茲在茲馮道詩云口是禍之門舌是斬身刀則俗甚矣

然馮道亦有不可及處舊五代史胡饒傳清泰初馮道出

鎮同州饒時爲副使道以重臣稀于接洽饒忿之每乘酒于牙門誦道道必延入待以酒醕致敬而退道謂左右曰此人爲不善自當有報吾何怒焉饒後果爲王建立所殺

青瑀

張平子思元賦左青瑀以撻芝兮右素威以司鉦注青瑀青文龍也撻豎也芝蓋也佛經稱帝釋麾幢羽蓋皆有龍王司之蓋本于此

頽

史記索隱解孔子圩頂云頂上窠也乃廣韻頽字釋云孔子頭也此說不知何本

白起

平原君曰澠池之會臣察武安君小頭而銳瞳子白黑分明視瞻不轉小頭而銳敢斷行也黑白分明見事明也視瞻不

轉執志強也可與持久難與爭鋒廉頗足以當之

嚴尤三晉將敘

### 播州

播州楊氏自唐季據有其地歷二十九世八百餘年至明萬厯初爲總督李化龍所滅置遵義平越二府其負嵎之久視晉宋間仇池楊氏更爲過之此亦不經見之事已

### 明人集

李濟川太守官比部時寓內城一舊家藏明人集及明末稗乘頗多余曾假十數種讀之內如釋德祥桐嶼集朱升楓林集皆失之俚鄭本忠安分齋集徐階世經堂集皆近于平孫需冰蘂稿楊一清石淙藁均有累句曾棨西墅集柯暹東岡集亦不耐看儲巵柴墟集蔡鏐汶濱集悉多平易黃省曾之

五岳山人集尤饒枝蔓蔣道林陳白沙俱近禪宗茅鹿門

年錄愈形拖沓至如盧五鵲朱天馬

名潮字必東

盧少樞胡少室

大都客氣未除無餘味曲包之妙又如項元汴蕉窗九錄陳

繼儒巖樓幽事屠隆游具雅編唐樞轄圖窩雜著查伊璜敬

修堂出處偶記或評量骨董或純蹈空談益覺纖佻瑣碎矣

出處偶記有云世傳余有一飯之德葛如方布衣野走懷之而思厚報其實無是事也葛如者吳六奇別字也然紐璠賦臍斷非憑空結撰吳驚拜經樓詩話謂伊璜以六奇既貴故為之諱其說為近之

### 江永

江永數學補云泰西人謂開闢以來至今只五六千年按中國有載籍始于唐虞之世距今四千餘歲伊祁以前雖略有傳聞而難于徵信計有人物之初距唐虞之世其年當不甚遠豈有遙遙五六萬載晦冥如夜竟無載籍可考耶天地儀



書謂自開闢至崇禎庚辰五千六百三十餘年聖經直解則云六千八百三十六年以理推之疑西說爲近也

### 高銓

菽園雜記云高憲副宗選曰今人于人物是非不公臧否失當譬之觀戲庸夫孺子一遇優人打諢作無恥狀莫不歡笑蓋此態固易動人而彼所好者正在此耳可謂長于譬喻矣按高公宗選名銓吾鄉耆舊也歿葬仙人掌西至今人呼高尙書墳石馬如故其隧道相傳卽秦少游冢云

### 金粟牋

金粟牋有最長印至五十八字者其印稱許咸熙妻陳五娘等捨藏經紙七千幅云云是物近日已不可得況澄心堂所製紙乎

唐人多工文者

唐人周夔以英州碧落洞山水奇麗賦到難篇云湏陽之石  
室兩崖捲束勢合如屋孱顏百間開待朝旭羽容電色霏繞  
瑤局峭然嵐壁宛矣仙躅夔不以文名而詞意之遒拔如此  
觀音巖壁立千尺碧落之亞也樓閣皆安石縫中蝸旋而上巖腹有國初廣督李棲鳳摩崖書字頗豪宕張讀宣  
室志語多奇峭王保定撫言稱讀幼擅詞賦年十八及第位  
至禮部侍郎又按李觀上梁補闕薦孟郊崔宏禮書云孟之  
詩五言高處在古無二其有平處下顧兩謝崔之文雄健宏  
深度中文質雖宏禮誤述今世罕傳然觀非妄語者蓋唐世  
工文之士多矣

千文

胡致堂敘古千文語多費解如賊莽竊璽冠佩猱豸白水龍

翔榮取青瑣其意以莽比猥而青瑣隱語爲舊物也小兒誦之如何能曉總之千字文以周興嗣爲第一次則許魯齋次則侍其良器詞采皆有可觀卽卓珂月膳枇素木夫男秉杷究欠自然之妙

### 府署

直省府署較道署爲宏敞者蓋府治多前明之舊明太祖定府治深七十五丈闊五十丈州縣次之見陸容菽園雜記容所云蓋據其時之温州府志也第明朝知府有上中下三秩從三品正四品從四品之不同見張懋修太岳雜著跋

### 金鯉

吳萊南海古蹟記中宿峽一曰峽山在清遠東對峙江中秦趙胡曾釣得金鯉于此有釣鯉臺云朱竹垞峽山寺詩澄潭

犀去沈金鎖古洞猿歸帶玉環上句不的若用釣鯉事則較爲典切矣

### 慶馬

許有壬和弟有孚獨坐投壺詩綠陰清晝矢鳴壺慶馬何煩用酒娛有主無賓聊一笑却呼僮僕煮皋廬大戴禮投壺篇三馬旣立慶多馬馬算也小戴亦同經語入詩究嫌腐耳

### 相駝

相駝之法峰豎則行速以鼻完者爲佳餽駝之法飲畢少飼

以鹽牽時謹護其鼻恐擁擠壞其鼻則力減

見張文端鵬翮俄羅斯行程記

凡馬八歲一變語云七驄八白言馬至八歲驄變而白也

雅

說馬子蒸其母則生駁馬

孔平仲談苑

### 客傲

郭景純客傲臯壤爲悲欣之府蝴蝶爲物化之器又云不塵不冥不驪不騁語極奇峭

### 黨禁

黃太沖曰甚哉小人之愚也小人之仇君子必指之爲朋黨大書深刻列其姓名將使後世之人亦心疾之也乃蔡京立元祐姦黨碑而三百九人者後人各爲之列傳韓侂冑立慶元黨人碑而劉後溪遂以慶元黨人之名名游監簿之墓黨人之家亦各以其名名其門原小人之心以爲被是名者不勝其辱矣孰知適以榮之耶

### 岳王

宋南渡四大將惟岳王一軍最苦食嘗不繼趙鼎狀云岳飛一軍月支錢一十二萬三千餘貫米一萬四千五百餘石數

目浩大去年錢糧缺乏轉運司應付不繼有誤指揮致本軍殺馬剪髮賣鬻妻子轉易米斛幾致生事其疏甚悉具載鼎集乃宋章穎作南渡十將傳首劉錡次岳王真不可解

### 張浚

趙鼎建炎筆錄云建炎三年五月十五日真州報云樞密使張浚爲高郵賊薛慶拘留浚自鎮江徑渡往彼撫諭慶欲邀厚賞故脅留之三日乃以兵衛之而出上初聞憂甚遣統制官王玘提兵往平其事玘始渡江浚已歸矣元鎮所記當是實錄其丁巳筆錄尤多形容魏公擠陷之詞

### 沈作喆

沈作喆寓簡云秦會之旣主和議大帥皆罷兵權賜田宅予爲岳侯作謝表有云功狀蔑聞敢遂良田之請謗書狎至猶

存息壤之盟會之讀不<sub>與</sub>則沈固鄂王僚佐朱仙鎮廟庶當補題其姓氏也

貴悟

天下事多從悟入張旭自言見公主擔夫爭路而得筆法後見公孫氏舞劍器其書益進劉元塑岳廟侍臣像久而未就偶見秘閣所藏魏徵像遂應手而成

見黃梨洲集

徐積讀史記貨

殖傳人棄我取人取我與遂悟作文之法賈生鵬賦本于鵠

冠

柳子厚說亦如此

漢書之雅馴者多本管子

張嶠管子序

范文正公爲

岳陽樓記尹師魯曰此傳奇體耳傳奇者唐裴鉞所著小說也從古作者未有不從悟得信乎劉勰之論曰言徵實而難巧意翻空而易奇

十八侯

班固十八侯銘鄼侯蕭何與鄼音才何反舞陽侯樊噲留侯張

良絳侯周勃平陽侯曹參戶牖侯陳平南宮侯張敖曲陽侯

酈商穎陽侯灌嬰汝陰侯夏侯嬰陽陵侯傅寬信武侯靳歙

安國侯王陵襄平侯韓信不曰淮陰侯不可解棘津侯陳武曲成侯蟲

達汾陰侯周昌青陽侯王吸其次序如此與漢書注不同不曰贊而

曰銘孟堅創格也蟲達事蹟僅見功臣表銘云晏晏曲成與

從龍騰安危從主赤曜以升赫赫皇皇道彌光明惟德御國

流及後萌呂溫狄梁公贊從此生出據表達孫柔元鼎二年坐為汝南太守知民不

用赤側錢為賦為鬼薪其會元孫不復嗣侯僅襲三世

### 中涓

漢初以中涓得侯者十人師古曰中涓親近之臣若謁者舍人之類也涓潔也主居中掃絮也

平陽懿侯曹參信武肅侯靳歙清河定侯王吸廣嚴侯召歐



絳武侯周勃頴陰懿侯灌嬰樂成節侯丁禮堂陽哀侯孫赤  
紀匡侯陳倉張節侯毛釋之以舍人得侯者二十三人陽陵  
景侯傅寬廣平敬侯薛歐博陽嚴侯陳濞舞陽武侯樊噲成  
敬侯董濞費侯陳賀都昌嚴侯朱軫武彊嚴侯嚴不職魏其  
嚴侯周止平悼侯工師喜魯侯奚涓昌武靖信侯單究東牟  
敬侯劉到斥邱懿侯唐厲臺定侯戴野辟陽幽侯審食其酈  
成制侯周緤朝陽齊侯華寄猗氏敬侯陳遯甯嚴侯魏遯慎  
陽侯樂說告韓信反者甯陵夷侯呂臣祝茲夷侯徐厲詳功臣表

### 連敖

漢興悉用秦時官制亦閒有循楚舊者如合連尹莫敖爲一  
曰連敖是也隆慮克侯周竈以連敖入漢以長鉅都尉擊項  
籍侯柳邱齊侯戎賜以連敖從起薛河陵頃侯郭亭以連敖

從起單父煮棗端侯革朱以越連敖從起薛俞侯呂它父嬰以連敖從高祖破秦

吞二周非始皇

賈誼過秦論言始皇吞二周而亡諸侯按秦昭王五十一年滅西周後七年莊襄王滅東周則吞二周乃始皇之祖若父非始皇也

廂

宋子京曰我與之生故能爲吾死我與之樂故能爲吾憂廂于場者雞至嗟于牢者豕集惠于國者天下治

白堊湛淵靜語俗以舌音

祝祝致犬唇音汁汁致猫雞朱朱豕盧盧廣韻屢字注云屢屢吳人呼狗聲

吳枋

南宋吳枋字方木著宜竺野乘議論多有可采其謂舜爲黃

帝八代孫於堯爲四世姪孫則大誤也貳室館甥斷非同姓  
舜爲幕後此萬不能參以臆說者又其序云遭畢方之禍延  
燎數萬家西山經云章莪之山有鳥如鶴一足名曰畢方見  
則其邑有譌火是畢方爲妖鳥詎可以代火災字乎

### 天狐策

溫飛卿乾牋子中有應天狐超異科策文有云五行七曜成  
此間餘上帝降靈歲且涖涂蛇蛻其皮君亦神攄九九六六  
束身天除何以充喉吐納太虛何以蔽保霞珪雲袂哀爾浮  
生擲此荒墟吾復浩氣還形之初在帝左右道濟忽諸吳聿  
觀林詩話亦錄其語

### 劉跂

劉跂與孫秀才書云詞章之變隨世損益賈生峻發文潔而

體清子政簡易趣昭而事博子雲沈寂志隱而味深平子淹  
通慮周而藻密

柳菴云文章以氣爲主

### 皇甫湜

皇甫湜諭業云燕公之文如榧木楠枝締造大廈上棟下宇  
孕育萬象可變陰陽而閱寒暑坐天子而朝羣后許公之文  
如應鐘鼗鼓笙簧鐸磬崇牙樹羽考以宮懸可以奉神明享  
宗廟李北海之文如赤羽元甲延亘平野如雲如風有軀有  
虎闐然鼓之吁可畏也賈常侍之文如高冠華簪曳裾鳴玉  
立于廊廟非法不言可以望爲羽儀咨以道義李員外之文  
如金輦玉輦雕龍綵鳳外雖丹青可掬內亦肌體不充獨狐  
尙書之文如危峰絕壁穿倚霄漢長松怪石傾倒溪壑然而  
略無和暢雅德者避之楊匡州之文如長橋新建鐵騎夜渡

雄震威厲動心駭魄然而鼓作多容君子所戒權文公之文如朱門大第氣勢宏敞廊廡廩廐戶牖悉周然而不能有新規盛概令人悚觀韓吏部之文如長江秋注千里一道衝飈激浪汙流不滯然而施諸灌溉或寡于用湜評如此並非心折于昌黎也其韓文公銘云茹古涵今無有端涯渾渾灝灝不可窺校及其酣放凌紙怪發鯨鏗春麗震耀天下然而栗密窈眇章妥句適精能之至出神入天自姬氏以來一人而已矣與長江秋注之評後先矛盾蓋諛墓之文耳

蔣說

蔣虎臣先生著書名蔣說亦有所本後漢酈炎誠子止戈遺令云我十七而作酈篇二十四而州書矣二十七而七平矣古文苑章樵注酈篇州書皆字學之書七平蓋效枚乘七發

體蔣說猶酈篇耳

學士

宋時甲科出身便稱學士許叔微紹興二年進士醫家謂之許學士是也勛貴多稱太尉李煜歸朝只爲特進而徐鉉往謁語聞者云願見太尉种諤官知延州而趙起列其行事作种太尉傳蓋流俗之通稱矣

金櫛

四品以上長官以塗金雙瓜前導五品以下則塗銀俗謂金瓜其實當作櫛字楊基詩云錦襜繡帽列金櫛

善狀竹梅者

張羽竹深亭記云每清風激林驟雨倏至飄蕩播洒萬葉交振鷦鷯鵠鵠之類翔萃其中鳴聲啁啾與天籟合仁大仁細

聽之無窮故吾知是亭于風雨爲宜窮陰之夕雪霰交墜玲瓏蕭條坐聽旣久心寒耳淒則就枕而臥中夜聞折竹聲如裂帛如櫟敵清迅激越出人不意仁寐復寤旦起視之高者竦峭下者披靡琅玕翠碧化爲瑤林變眩洞射暗牖皆白故吾知是亭于雪爲宜烟霏朝斂黛綠搖翳日光穿漏影布窗上翕忽推移偃仰開合雖善繪者莫能窮其態投林之翼與暝色偕至流霞倒影晃搖其顛久而後沒故吾又知是亭于晴爲宜屬樊榭謂得竹之情狀東坡雜記全錄之近讀程侍郎恩澤香雪海記云舁者譁曰欲觀梅乎須至菖蒲潭及潭西乃至菖蒲潭彌望十數里若明雲屯積時驕陽乍升芳馥漚鬱中人如醇酒至潭西鐵幹桀立丹者碧者縹者赭者色相糅者如以錦綺裹虬龍愈攫拿愈斌媚香益酷烈順風聞

數里外是役也攬湖上之山佛螺帝青若烟點著明鏡則蟠  
螭最自萬梅影中掬湖光于掌上則六浮閣還元閣最天然  
而夥則菖蒲潭最畦瑰珍寶各競殊麗則潭西最其文亦盡  
梅之情狀矣惜不令樊榭見之

曹輔

曹輔顏文忠公廟銘祿山一呼逆焰熾天炎于崑岡沸于百  
川屹屹魯公忠誠是仗大義凜然奮裾首唱一清土門數斬  
偽將十有七州聞風順嚮屹屹魯公剛實積中學奧問博涵  
演擴充孝友施家發爲公忠直道以行孰顧我躬讒口猥偷  
往齒其鋒屹屹魯公不戒于剛婉變媚嫉假手虎狼公在貌  
脆得困之義有嚴分守卒遂吾志屹屹魯公風于百世

碑乃秦淮

海書有二王意碑陰則米南宮記陶八八授刀圭事

輔又工詩其答晁无咎云下瞰羣



峰聳如槍攀蘿捫壁疲獲城不滅文潛少游輩也

楊敬之

楊敬之華山賦醯雞之往來周東西矣蜂蝎之聯聯阿房成  
矣見若繭栗祖龍藏矣小皇燁燁咸陽焚矣李太尉擊節稱  
賞其實襲小杜阿房耳

小將

唐闕史裴晉公見皇甫湜文嘆曰木元虛郭景純江海之流  
也因以寶車名馬繒絲器翫約于餘緡置書命小將就第酬  
之正郎省札大怒擲書于地叱小將曰寄謝侍中何相待之  
薄也小將者蓋卽今巡捕旗牌之類此稱自漢以來已有之  
漢書灌嬰傳攻黔布斬其小將十人吳志丁奉傳少以驍勇  
爲小將

高彥休此條贊甚佳其詞云參寥子曰稱衡恃才名  
傲黃祖而死正郎以直氣抵晉公而生尊賢容眾之

風山高水深之量較  
之古今懸雖鳳矣

### 七說

桓麟有七說傳毅有七激張衡有七辨崔瑗有七蘇崔駰有  
七依酈炎有七平王粲有七釋左思有七諷傅休奕有七謨  
顏延之有七釋梁簡文帝有七勵皆本于枚乘也

東方朔七  
諫係騷體

不以七  
論也

### 石佛

苻秦時于敦煌城南四十里鑿山爲佛多至數千龕宋元以  
還圯者數百沙壅而失者數百梯壞不可登者又數百其現  
存者尙不可以數計苻秦沙門樂傳建元二年所立碑乾隆  
中土人尙見之後爲沙壓無由復得僅存周李君重修莫高  
窟佛龕碑其紀年用武氏又睡佛洞外有開元時李府君功

德碑又如來窟顛有大宋乾德八年歸義軍節度使西平王  
曹元忠建摩厓大字乾德只五載而云八年者豈其時道途  
偶阻朝命有未通歟許玉年先生敦煌千佛巖歌敘其事甚  
悉歌有云就中一佛聳百丈天外昂頭出雲上人人耳輪倚  
藤杖彼鎮州大像不足言矣

玉年先生集于西域事最詳有咏物詩二十首土雨明霜樹窩

鹽池紅柳白楊夏草雪蓮沙棗胡桐孔雀天鵲紫柳菊白桑  
葦茂草莎莎柴沙雅梨哈密瓜蒲桃酒普爾錢又謂月牙  
泉卽古渥洼水云佛說四十二章經云視大千界如一訶子視阿耨

池如塗足油固宜有此詭異觀也

### 張王

京口賽張王會丹徒令必躬扶神輦否則徒陽河涸漕運維  
艱廣州右翼都統壁間供一羅漢像署中奉之加虔否則咎  
徵見

蟠龍丈人

海州雲臺山來自蒼梧上有南方草木極高處曰青峯頂金

牛頂呼吸可通帝座

陶文毅公詩云黃流一氣包淮海青頂雙峯夾雨雷

而三元宮澗

側一松尤怪髣髴拂地若常山之蛇曲折回環不可思議黃海之蒲團倒挂不足奇矣陶文毅公爲之下拜呼曰蟠龍丈人

章陸

左道刻章陸根爲人形咒之能知休咎名章陸神

見蒿庵話蓋

卽爾雅之蓬藂馬尾也郝疏言其狀甚詳並云一名王母柳

游都

大壬書云元女言甯可與人妻孥不可示人游都蓋課中見

游都卽思所以豫防故也

樗寮

張卽之書世言可辟火其所寫華嚴經冊久歸天府因缺一  
卷裘文達公曰修爲摹補之方宋盛時石曼卿壁窠書最爲  
雄偉張文潛詩云煌煌三佛榜銀貫金石紐非過譽也其次  
則王才叔兄弟才叔名廣淵弟臨字大觀皆工大字魁梧擁腫治平初價  
值千金黃山谷云今才叔曼卿遺墨絕少而樗寮真跡購獲者什  
襲而藏真有幸有不幸耳

星命

星命之書以李虛中爲祖以萬民英星學大成及三命通會  
爲大備其玉照定真經則託名郭璞者也星命溯源則託名  
張果者也或云珞琰子卽陶宏景然梁時無所謂八字則其  
說非也星命總括出于遼之耶律純玉管照神出于南唐宋

齊邱

齊邱本溫姓避南唐義祖諱改為宋氏

太清神鑑出于周之王朴人倫大

統賦出于金之張行簡注三命消息賦者王廷光李全曇瑩

徐子平凡四家焉

圭勺

王元之詩行年過半百功業無圭勺宗忠簡為兄汝賢墓誌未嘗以圭撮干親舊亦未嘗以點墨擾州縣按隋志論嘉量引孫子算術云六粟為圭十圭為杪十杪為撮十撮為勺十勺為合蠶所吐絲為忽十忽為秒十秒為毫十毫為釐十釐為分

手勢

皇甫崧論手勢云差其指如鸞欲翔舞柔其腕如龍欲蜿蜒飛其袂如魚躍大浪即今觴政之拇戰也元人姚文與詩云

剝將蓮子猜拳子玉手雙開不賭空曰不賭空則拳中有物如近日猜花之類

### 補心丹

明人鄧苑一草亭眼科全書云合天王補心丹用人參元參丹參天冬麥冬各一兩五味子柏子仁酸棗仁遠志肉白茯神當歸身各二兩白桔梗生地黃各五錢煉蜜爲丸如椒目大白滾湯吞服三錢治心血不足神志不安超按疲倦就枕神志不安有似怔忡者細嚼南棗二三枚即可成睡余親驗之

### 九卿

後漢書虞詡傳注九卿謂太常光祿衛尉廷尉太僕大鴻臚宗正大司農少府然此漢制也咸豐戊午夏會訊故相耆英

一、案大學士六部九卿會議主稿者樞堂時焦太僕佑瀛領班徧檢檔冊並無指定何項衙門爲九卿阮葵生茶餘客話所云六部都通大爲大九卿實亦得自傳聞非確証也焦君與家幼竹太守錫綬議請于樞堂除六部及四品以下衙門外以都察院通政司大理寺太常寺太僕寺光祿寺順天府尹宗人府丞理藩院九項衙門當之其議遂定

### 三鉉

春秋時楚稱上卿爲三珪景瑤大招三珪重侯聽類神只六朝時或稱三公爲三鉉徐孝穆文秩愈三鉉任總百司

### 太傅

潘文恭公思補齋筆記云本朝大學士贈太傅者八人馬齊謝陞張英朱軾劉統勳蔡新董誥朱珪加大傅者六人鄂爾



泰范文程金之後曹振鏞阮元暨臣世恩而六超按大學士明珠亦加大傅見朱竹垞詩注宰輔錄云加太子太師恐非其侍郎生加大傅者咸豐初有杜太傅壻其它未聞至提督遷制府者凡六人趙良棟及子宏燦梁鼎岳鍾琪楊遇春近有楊制軍岳斌

### 三公

韓詩外傳三公者何曰司空司馬司徒也司馬主天司空主土司徒主人司馬主天之說它書未聞僅見于此

### 樂記逸文

白虎通引樂記曰墳坎音也管艮音也鼓震音也弦離音也鐘兌音也祝敵乾音也今樂記無此文宋廣韵鵠字注云韓詩云孔子嘗聞河上人歌曰鵠兮鵠兮逆毛衰兮一身九尾

長兮今外傳亦無此

方湖

道光中應童試時作曲江濤閣賦用員嶠方湖字李方赤師疑湖字誤後檢拾遺記云員嶠山上有方湖周同千里方信非筆舛也公喜甚告沈蓮叔都轉師云城中有書簾我公請試之

古人用字有極奇者

王子淵洞簫賦幸得諡爲洞簫今蒙聖主之渥恩謚猶稱也謂匏底曰魁潘岳笙賦云各守一以司應統大魁以爲笙

相心

虎鈴經相人篇云心圓者上也鈴次之破地者主奸詐心如月形者盜如弓形者非命夫心藏于腹欲見無由許洞此言

得毋齊東野人語乎

駟介

詩衛風清人在彭駟介旁旁傳介甲也箋駟四馬也朱子集傳駟介四馬而被甲也古時馬皆有鎧榕堂續錄所引失之眉睫矣又古時馬亦有衣白廷玉湛淵靜語引左傳注云褐馬衣

小棠

詩甘棠傳蔽芾小貌甘棠杜也箋召伯聽男女之訟不重煩勞百姓止舍小棠之下而聽斷焉國人被其德說其化思其人敬其樹小棠二字從未有引用者此詩據韓詩外傳謂在位者不恤百姓耕桑失時詩人追思召伯而作而焦氏易林云大樹之子百條共母當夏六月枝葉盛茂鸞鳳以庇召伯

游暑又似召伯避暑憩于其下非聽訟矣

焉

埤雅引師曠禽經曰青鳳謂之鵠赤鳳謂之鵠黃鳳謂之焉  
白鳳謂之鸞紫鳳謂之鶯又云鳳神鳥也俗呼鳥王愚按東  
漢太尉桓焉字叔元義取于鳳鳳爲鳥中元首故字曰叔元  
華陽國志張綱劾太尉桓焉司徒劉壽尸祿素殮不堪其職

孝廉

後漢書丁鴻傳以鴻行太尉兼衛尉鴻與司空劉方上言凡  
口率之科宜有階品蠻夷錯雜不得爲數自今郡國率二十  
萬口歲舉孝廉一人四十萬二人六十萬三人八十萬四人  
百萬五人百二十萬六人不滿二十萬二歲一人不滿十萬  
三歲一人帝從之漢世孝廉之選慎重如是

苞棣

陸佃埤雅唐棣一條云詩曰山有苞棣隰有樹檤苞棣以況可與權之臣樹檤以況可與立之臣可與權者在上可與立者在下穆公之業也數語不知何本埤雅旨宗王氏不無穿鑿然所援古書甚多猶可貴耳

支祁

陳士元江漢叢談引古岳瀆經云禹治淮水三至桐柏山驚風迅雷石號木鳴土伯擁川天老肅兵功不能興禹怒召百靈授命夔龍桐柏千君長稽首請命禹因囚鴻蒙氏彭商氏兜氏廬氏犁婁氏乃獲淮渦水神無支祁善應對言語形若猿猱縮鼻高額青軀白首金目雪牙頸伸百尺力逾九象搏擊騰越疾利倏忽視不可久禹授之童律童律不能制授之

烏木田烏木田不能制授之庚辰庚辰能制鴟脾桓胡木彪  
水靈山妖石恠犇號叢繞者以千數庚辰持戟逐去頸鎖大  
械鼻穿金鈴徙之淮陰龜山之足其文淺顯雖故作聾牙詰  
屈之態而一覽了然迥異周秦諸子如逸周書嘗來解述禹  
功云皇天哀禹賜以彭壽思正夏畧雖僅十數字而孔晁不  
敢妄爲注矣

南齊書語卷之二

江都蔣超伯輯

大招

文選取招魂未登大招今錄之云青春受謝白日昭只膏氣  
奮發萬物遽只冥凌浹行魂無逃只魂魄歸來無遠遙只魂  
兮歸來無東無西無南無北只東有大海弱水漉漉只螭龍  
並游上下悠悠只霧雨淫淫白皓膠只魂兮無東湯谷寂寥  
只魂兮無南南有炎火千里蝮蛇蜒只山林險隘虎豹蜿只  
鰐鰕短狐王虺鴛只魂兮無南蜮傷躬只魂乎無西西方流  
沙潏洋洋只豕首從目被髮鬢只長爪鋸牙談笑狂只魂乎  
無西多害傷只魂乎無北北有寒山連龍施只代水不可涉  
深不可測只天白顥顥寒凝凝只魂乎無往盈北極只魂魄

歸來間以靜只自恣荆楚安以定只逞志究欲心意安只窮  
身永樂年壽延只魂乎歸來樂不可言只五穀六仞設菰梁  
只鼎臠盈望和致芳只內鵠鵠味豺羹只魂乎歸來恣所  
嘗只鮮鱸甘雞和楚酪只醢豚苦狗膾苴蓴只吳酸蒿蕪不  
沾薄只魂乎歸來恣所擇只炙鴟烝鳧飴鵲嗽只煎鱖臠雀  
遽爽存只魂乎歸來麗以光只四酎並熟不涇隘只清馨凍  
飲不歡役只吳醴白蘘和楚漈只魂乎歸來不遽惕只代秦  
鄭衛鳴竽張只伏戲駕辨楚勞商只謳和陽阿趙簫倡只魂  
乎歸來定空桑只二八接武投詩賦只叩鐘調磬娛人亂只  
四上競氣極聲變只魂乎歸來聽歌謠只朱唇皓齒嫵以姮  
只比德好閒習以都只豐肉微骨調以娛只魂乎歸來安以  
舒只嫵目宜笑蛾眉曼只容則秀雅穉朱顏只魂乎歸來靜



以安只姱修滂浩而以佳只會頰倚耳曲眉規只滂心綽態  
姱而施只小腰秀頸若鮮卑只魂乎歸來恩怨移只易中和  
心以動作只粉白黛黑施芳澤只長袂拂面善留客只魂乎  
歸來以娛昔只青色直眉美目嫺只鬢輔奇牙宜笑嗎只豐  
肉微骨體便娟只魂乎歸來恣所便只夏屋廣大沙棠秀只  
南方小壇觀絕霄只曲屋步櫺宜擾畜只騰駕步游獵春囿  
只瓊轂錯衡英華假只蒨蘭桂樹鬱深路只魂乎歸來恣志  
慮只孔雀盈園畜鸞皇只鵠鴻羣晨雜鶩鷦只鴻鵠代游曼  
鵬鷖只魂乎歸來鳳皇翔只曼澤怡面血氣盛只永宜厥身  
保壽命只室家盈延爵祿盛只魂乎歸來居室定只接徑干  
里出若雲只三圭重侯聽類神只察篤天隱孤寡存只魂乎  
歸來正始昆只田邑千畛人阜昌只美冒眾流德澤章只先

威後文善美明只魂乎歸來賞罰當只名聲若日照四海只  
德譽配天萬民理只北至幽陵南交趾只西薄羊腸東窮海  
只魂乎歸來尙賢士只發政獻行禁苛暴只舉傑壓陞誅譏  
罷只直羸在位近禹麾只豪傑執政流澤施只魂乎歸來國  
家爲只雄雄赫赫天德明只三公穆穆登降堂只諸侯畢極  
立三卿只昭質旣設大侯張只執弓挾矢揖辭讓只魂乎歸  
來尙三王只招魂未及旼游大招指歸諷諭縟采不逮意則  
駕之

昌黎之誚

昌黎釋言云愈爲御史得罪德宗朝同遷于南者凡三人獨  
愈爲先收用相國之賜大矣百官之進見相國者或立語以  
退而愈辱賜坐語相國之禮過矣詞意諛甚至其示兒一詩

誇屋廬之新述基架之樂羨玉帶金魚之貴殊不類其爲人  
宜乎見誚于朱子也瞿佑歸田詩話欲爲剖辯陋哉

### 書伴苞苴

明世苞苴盛行但其餽遺必以書爲副尤以新刊之本爲貴  
一時剗剗紛如豕魚罔校如陳植木鐘集宏治中温州知府  
鄧淮重刊都穆南濠詩話乃和州黃桓所刻其序云捐  
俸繡梓用廣厥傳似此不一而足

### 十八學士

十八學士之目唐時凡再見一太宗朝間立本畫像褚亮作  
贊其人爲杜如晦房元齡于志寧蘇世長薛收褚亮姚思廉  
陸德明孔穎達李元道李守素虞世南蔡允恭顏相時許敬  
宗薛元敬蓋文達蘇最後薛收卒補以劉孝孫此貞觀文學

館十八學士也一明皇時董夢畫像上自爲贊其人爲張說  
徐堅賀知章趙冬曦馮朝隱唐子元侯行果韋述敬會真趙  
元默毋甕呂尙咸龔業李子釗東方顯陸去泰余欽孫季良  
此開元含象亭十八學士也

古文尙書

古文尙書晉元帝時由豫章內史梅賾奏上自云太保鄭冲  
以授扶風蘇愉愉授天水梁柳柳授城陽臧曹授汝南梅  
賾此書從無師說蓋卽賾僞爲也至南齊姚方興又增曰若  
稽古帝舜二十八字時梁武帝爲齊博士駁之不行古文之  
僞其理本不難推凡左氏所引杜預皆注曰逸書卽晉初未  
有此書之確證無如孔冲遠等爲作正義又並姚方興二十  
八字錄之公然與伏生二十九篇混而爲一此六經中之一

大異事也追吳械始生異議朱子亦稍稍疑之吳澄梅賾諸人相繼抉摘偽迹益著然尙未窮形盡態也本朝間百詩惠定宇兩先生援經據古一一攻其癥結如老吏斷獄不容復有遁詞雖毛西河極口呼冤不能翻案此又我朝漢學重興之一大快事矣

間著古文尙書疏證八卷惠著古文尙書攷二卷

## 二劉

孔穎達之尙書疏原本二劉

六朝以來爲尙書正義者凡六家蔡大寶巢倚費彪顧彪劉焯

劉焯以二劉爲詳雅

晁公武讀書志謂因梁費彪疏而廣之其說非也

毛詩之學自王肅後或申毛難鄭或申鄭難王至唐貞觀十

六年穎達等因鄭箋而爲正義聚訟始息然冲遠于毛詩雖

主鄭箋實取材于劉焯之義疏劉焯之述義如二劉者固毛

鄭後之類瀾砥柱也其功偉矣

穎達之禮記正義原本皇侃間采熊安生之說

舍毛

鄭而別爲新義自歐陽永叔始逮程大昌王柏之徒出變本加厲愈爲怪誕不經已

賈公彥

賈公彥洛州永年人永徽中官太學博士事蹟具舊唐書儒學傳周禮儀禮二疏皆出其手與鄭康成注歸然並列亦唐

初一鉅儒也

注荀子者楊倞汝士之子注法言者有侯芭宋衷李軌辛德源柳宗元宋咸吳祕及司馬光集

注凡八家

戴東原汪容甫論大學

戴東原先生十歲就傅塾師授以大學章句讀至右經一章問其師曰此何以知爲孔子之言而曾子述之又何以知爲曾子之意而門人記之師曰此朱子云爾先生曰朱子何時人師曰南宋曾子何時人師曰東周問周宋相去幾何時師

曰將二千年矣先生曰然則朱子何以知其然師不能答

見漢

學師承記  
戴震小傳

汪中曰門人記孔子之言必稱子曰子言之孔子

曰夫子之言曰以顯之今大學不著何人之言以爲孔子終  
嫌無據也又曰周秦古書凡一篇述數事則必先詳其目而  
後備言之凡逸周書管子韓非子皆然戴記祭統之十倫孔  
子閒居之五至三無皆是也今定爲經傳以爲二人之詞而  
首末相應實出一口非所以解經也總之大學一書其文平  
正無疵與坊記表記緇衣伯仲乃孔氏之支流餘裔儒家之  
緒言記禮者之通論爾

汪中大  
學平義

### 大戴禮以王氏述聞爲當

大戴禮一書在漢時統稱禮記後漢書桓郁傳竇憲疏所引  
禮記卽大戴也楊終與馬廖書所稱禮制亦大戴也第後周

盧景宣注多闕近世曲阜孔廣森檢討所注凡十三卷較爲詳贍與棲霞郝氏爾雅疏並稱于時而王文簡公引之大戴禮經義述聞博引繁徵務求其當又在稟軒之上洵信都太傅之功臣矣

張力臣深於說文之學

山陽張力臣曰彊者弓有力也強則斫也非彊也序乃庠序之序是學名非次敘之敘也艸字象形若草則櫟斗實也別爲一字氣字原作乞氣卽飢字故從米干人之材曰俊若雋則肥肉也冏乃弓之橫體引弓射佳故曰得雋非俊也今加人于雋旁通以爲俊謬之大者矣

旅呂通

楚莊王名旅穀梁作呂是呂旅古通說文呂髀骨也象形昔



太嶽爲禹心呂之臣故封呂侯則呂卽齊矣有謂呂非兩口  
神仙不識字者然宮無上道人亦有所本管子曰者二君之  
在臺上口開而不闔是言莒注莒字兩口故二君開口相對  
卽知其言莒

### 黃度等

王西莊曰漢儒說經必守家法自唐貞觀撰諸經義疏而家  
法亡自宋元豐以新義取士而漢學絕由是黃度楊簡之徒  
壞尙書度有尙書說簡作五誥解葉時俞廷椿壞周易時撰禮經會元庭椿作復古編李  
樗黃樞鄭樵王質之徒壞毛詩樗樞爲毛詩集解王質有詩總聞李杞程大  
昌之徒壞周易杞作周易詳解大昌著易老通言穿鑿傳會破碎支離雖一  
代中疊起鉅儒而此風已不可挽斯蓋世運爲之豈獨王介  
甫一人悍然不顧而已

力攻陳澔

洪稚存督學貴州時曾奏陳澔禮記注凡說空言絕無師法  
宜易以鄭康成注惜格于部議然前此成容若已有禮記集  
說補正三十八卷力攻陳澔集說之疎矣其書據理推求隨  
文駁詰詳明賅博在方靈皋禮記析疑之上第容若擅長詞  
曲傳唱朝鮮朱竹垞等奔走其門哀挽詩中未及著書之事  
或出門客幕僚之手未可知耳

漢學師承記云方侍郎苞自負其學見江永以士冠禮士

昏禮數事爲問永從容答之苞負氣不服永晒之

高祖乃通稱

古人于遠祖多稱高祖左氏郊子曰我高祖少皞是也遠孫  
多稱曾孫左氏蒯賁曰曾孫蒯賁敢昭告皇祖文王是也

孟子

朱注公劉后稷之曾孫也亦此例

三堂

明時鎮守太監總兵官及巡撫號爲三堂

見菽園雜記

司禮太監

自稱內翰馮保經書音釋跋尾其私印曰內翰之章

見四庫書目

十二疾

韓詩外傳人主之疾十有二發非有賢醫莫能治也何謂十二發痿蹶逆脹滿支膈盲煩喘痺風此之曰十二發賢醫治之何曰省事輕刑則痿不作無使小民飢寒則蹶不作無令財貨上流則逆不作無令倉廩積腐則脹不作無使府庫充實則滿不作無使羣臣縱恣則支不作無使下情不上通則膈不作上材恤下則盲不作法令奉行則煩不作無使下怨則喘不作無使賢伏匿則痺不作無使百姓歌吟誹謗則風不作按所謂支者四支之病也支卽肢字易坤卦美在其中

而暢于四支

張蒼乃儒相

漢書藝文志陰陽家有張蒼十二篇列鄒奭子閭邱子之上  
蒼固儒相也經典敘錄云左邱明作傳以授曾申申傳衛人  
吳起起傳其子期期傳楚人鐸椒椒傳趙人虞卿卿傳同郡  
荀卿名況況傳武威張蒼蒼傳洛陽賈誼然則蒼乃荀卿高  
弟賈生之師也江中曰武威當作陽武順帝時翟酺上言云孝文皇帝  
始置五經博士意其時張蒼柄用博士之置當由于蒼雖班  
史弗詳然淵源有自己

詩異文

詩周南漢有游女不可求思韓詩外傳作抽觴以女不可求  
思召南之行露亦不女從外傳作亦不爾從秦風顏如渥丹

外傳作顏如渥頰大雅下民卒瘁外傳作下民瘁瘁周頌自  
羊徂牛外傳作自羊來牛齊桓公設庭燎一條末小雅以雅以南以簡  
不僭後漢書陳禪傳作目雅目南韎任朱離注以爲齊魯之詩此外  
齒如瓠棲見爾雅郭注或宴宴居息或盡頌事國見漢書五  
行志鶡弁如星參髮如雲見說文宋廣韻所引猗嗟頌兮見玉篇  
包有三枿見漢書敘傳注劉德引詩彙編窺豹集曾引各條  
茲不贅錄

### 葵丘盟詞

穀梁紀葵丘之盟與子車氏說脗合第彼繁而此簡耳其經  
云九月戊辰諸侯盟于葵丘桓盟不日此何以日美之也爲  
見天子之禁故備之也葵丘之盟陳牲而不殺讀書加于牲  
上壹明天子之禁注壹猶專也曰毋雍泉毋訖糴毋易樹子毋以

妾爲妻毋使婦人與國事

州黎止

爾雅釋止淮南有州黎止注今在壽春縣劉端臨經傳小記云鹽鐵論孔子能方不能圓故飢于黎止卽此蓋哀公二年蔡遷于州來卽州黎孔子自陳適蔡絕糧于是郝疏亦以劉說爲允余蕭客以郭璞注爾雅用舊注而掩其名謂之舍人孫炎李巡舊注而爲之釋並成注雅別鈔八卷攻陸佃等

揚子

伊川曰荀子極偏只一句性惡大本已失揚子雖少過然亦不識性是程子于子雲尙無甚貶詞也張衡耽好元經以爲妙極道數孫明復以子雲爲模範徐積史稱卓行譏賈誼而重揚雄司馬溫公于孟子致疑乃爲法言作集注最惡揚子

者只朱子耳

綱目書之爲莽大夫

然朴學之士至今重之劉端臨旣爲

荀子補注並爲方言補校云

### 神巫

逸周書豐保解以神龜敗卜列十敗之條次佞說讐獄之下  
成開解以神巫動眾繫九功之五次任利敗功之下蓋師巫  
左道王法所必誅也

### 六枳

馮衍顯志賦高吾冠之岌岌兮長吾佩之洋洋飲六醴之清  
液兮食五芝之茂英撻六枳而爲籬兮築蕙若而爲室播蘭  
芷于中庭兮列杜衡于外術章懷太子注六枳東觀記作八  
枳按周書呂刑篇嗚呼汝何敬非時何擇非德德枳維大人  
大人枳維公公枳維卿卿枳維大夫大夫枳維士登登皇皇

維在國枳爲都都枳維邑邑枳維家家枳維欲無疆言上下  
相維遞爲藩蔽也今載汲冢周書小開解章懷云呂刑謨矣  
逸周書多用醜字其義有可通有不可通此條枳字亦然疑敬通別有所本非用汲冢書語且數亦不合也

詹何

韓非子詹何坐弟子侍有牛鳴于門外弟子曰是黑牛也而  
白題詹何曰然是黑牛而白在其角使視之果黑牛而布裹  
其角也則何亦葛盧之亞

殷高宗殺孝子

後漢書郅惲傳惲乃說太子曰昔高宗明君吉甫賢臣及有  
織介放逐孝子注引家語曾參曰高宗以後妻殺孝子尹吉  
甫以後妻殺伯奇是武丁有廢立之事

關尹子之謬



古人著書必遠撫旁徵以引申其緒論大學一篇述及盤銘

荀卿之書多同戴記韓詩外傳引荀子之說凡四十有四條

汲冢周書於夏箴開望之詞亦皆採及文傳解引夏箴曰中

望曰土廣無守可襲伐土狹無食可圍竭班固之志地理禹

貢職方通篇彙入小戴之編禮記月令取呂覽中庸表記坊

記緇衣皆取子思樂記取公孫尼子沈約之說見信都太傅

之訂禮經亦然有采賈生說者有用周禮全文者蓋古人體

例無不如是莊列雖汪洋恣肆然遺文祕典亦往往見于其

中若關尹子一書創侂異之篇名一字二柱三極四符五炫

爐鼎之末技八籀篇青蛟白乃羽流之餘唾非諸子之訓言

矣焦竑以文始經決非關尹作其說當矣

游蹟

朱穆絕交論川瀆並決而莫敢之塞游殯蹂稼而莫之禁游殯卽郊特牲所云田豕也

正交

魯論子夏之門人一章蔡邕說獨異其正交論云子夏之門人問交於子張而二子各有聞乎夫子然則以交誨也商也寬故告之以拒人師也褊故訓之以容眾各從其行而矯之是以子夏子張所云皆聞之夫子也

經書創解

禮記文王世子夢帝與我九齡皇侃以九齡爲鈴鐸謂天以九箇鈴鐸與武王魯論周公謂魯公曰一章皇氏疏引孫綽

曰此是周公顧命

漢時臣下亦稱顧命見崔瑗趙谷等傳

十四博士

後漢書徐防傳防疏曰孔聖既遠微旨將絕故立博士十有四家注引漢官儀曰光武中興恢宏稽古易有施孟梁丘賀京房書有歐陽和伯夏侯勝建詩有申公轅固韓嬰春秋有嚴彭祖顏安樂禮有戴德戴聖凡十四博士史繩祖學齋佔畢謂大戴在十四經之列本此

嚴顏皆治公羊之學者

### 奏記如古箴銘

功曹張敞奏記諫王暢曰懇懇用刑不如行恩孳孳求姦未若禮賢隨會爲政晉盜犇秦虞芮入境讓心自生化人在德不在用刑此十數語宛然一則古箴

### 飛遁

張平子思元賦文君爲我端著兮利飛遁以保名章懷太子注引淮南九師道訓曰遁而能飛吉孰大焉惠定宇曰九師

道訓唐時已亡此衡集之原注也曹子建七啓亦云飛遁離俗

荀慈明

慈明之學深于易其舉至孝拜郎中對策陳便宜曰漢爲火德火生于木其象在周易之離在地爲火在天爲日又曰文王作易上經首乾坤下經首咸恆孔子曰天尊地卑乾坤定矣又引易曰帝乙歸妹以祉元吉言湯以娶禮歸其妹于諸侯也又曰今觀法于天則北極至尊四星妃后察法于地則崑山象夫卑澤象妻近取諸身則乾爲人首坤爲人腹遠取諸物則木實屬天根荑屬地又引易曰天地節而四時成皆本易以爲說也其貽李膺書曰頃聞上帝震怒貶黜鼎臣人鬼同謀以爲天子當貞觀二五利見大人不謂夷之初旦明

而未融虹霓楊輝弃和取同方今天地氣閉大人休否智者見險投以遠害雖匱人望內合私願想甚欣然不爲恨也亦本易以爲說也陳長孫鄭仲師馬季長鄭康成均傳費氏易慈明之傳亦宗費氏由是京氏頓衰

### 臣隸

隸者臣僕之通稱三國志陸凱疏云萬彧瑱才凡庸之質昔從家隸超步紫闥於彧已豐於器已溢猶言家臣也薛道衡隋高祖頌柳室瓊裘之長皆爲臣隸猶言臣僕也後漢書劉梁傳昔文翁在蜀道著巴漢庚桑瑱隸風移礪礪豈以其爲老聃之役故曰隸乎

九倉子九篇  
王士源僞作

### 稽古

王延壽魯靈光殿賦粵若稽古帝漢祖宗濬哲欽明姚方興

偽書云濬哲文明卽本乎此

精烈出吟

或云氣出精列古歌曲名馬融長笛賦序融旣博覽典雅精核數術又性好音能鼓琴吹笛而爲督郵無留事獨臥郿平陽鳴中有雒客逆旅吹笛爲氣出精列相和融出京師踰年暫聞甚悲而樂之注以爲古歌曲名殷芸小說則云笛聲一發感得精烈出吟有如相和其說較允

麋

左哀二年繁羽御趙羅宋勇爲右羅無勇麋之杜注麋束縛也按麋字當爲麋宋廣韵引左傳此文作麋之

筍將

公羊文公十有五年齊人歸公孫敖之喪何以不言來內辭

也脅我而歸之笱將而來也注將送也程春海游香雪海記云遂乘笱將誤矣

### 羈貫

穀梁昭十九年冬葬許悼公傳子既生不免乎水火母之罪也羈貫成童不就師傅父之罪也就師學問無方心志不通身之罪也心志既通而名譽不聞友之罪也名譽既聞有司不舉有司之罪也有司舉之王者不用王者之過也許世子不知嘗藥累及許君也注羈貫謂交午剪髮以爲飾成童八歲以上也梁書武帝紀數東昏罪云挺虐於髻躬之年植險於髻躬之日髻躬義與羈貫同

### 支解

邾婁人戕鄆子于鄆公羊傳殘賊而殺之也注支解節斷故

變殺言戕邾婁小邦未必上應天象乃漢書五行志云宣公十七年六月癸卯日有食之董仲舒劉向以爲後邾支解鄆子晉敗王師于貿戎董劉皆治公羊者也穀梁傳則云稅殺也注稅捶打也

### 塗裘

左菟裘公羊作塗裘其傳云隱曰否吾使脩塗裘吾將老焉齊人澁于遂左穀皆作藏公羊傳則曰澁者何澁積也眾殺成者也注齊人滅遂遂民不安欲去齊強成之遂人共以築投其所飲食水中多殺之與左穀飲成者酒說異

### 公羊文筆尤妙

張賓王曰左氏之爲言也敘儀節也典而方敘兵戎也森而武敘諫說也若爲刺若爲幾敘辭命也藻而嫺于度奕奕乎備哉而公羊氏不然無之而不游浪焉無之而不灑宕焉無



之而不鬻廷焉纍纍乎如貫珠之聯而澤也澹澹乎如蔗漿  
萍實之不五味而味也致足樂也晉劉兆以左公穀三家異  
趣互為讐敵取周官調人  
之義作春秋調  
人七萬餘言

公穀源流

公羊高齊人受春秋于子夏四傳而至董仲舒及胡母子都  
胡毋生再傳而至嚴彭祖顏安樂是為嚴顏之學仲舒以公

羊顯

有治獄十六篇  
皆公羊之學

又數傳而至何休

休作公  
羊墨守

晉初劉寔精

于公羊王接父子尤多新義其公羊論二篇乃庾翼問王愆

期荅也其後高龍孔衍徐彥邢昺或注或疏此公羊之源流

也穀梁赤亦子夏弟子一說名喜以春秋傳孫卿

顏師古說卿傳

申公申公傳江翁至尹更始始為章句其後有唐固麋信孔

衍江熙等十餘家范武子以其膚淺復為之注至今宗之此

外如石趙聶熊之注唐楊士勛之疏今皆不傳此穀梁之大槩也漢書藝文志又有公羊外傳五十篇穀梁外傳二十篇今不可考矣近世惟王文簡公引之深于公穀如公羊傳趙盾就而視之則赫然死人也援說文及續漢書禮儀志逐疫詞赫汝軀爲解穀梁傳之造辟而言詭辭而出援風俗通過舉篇入則造膝出則詭辭及魏志高堂隆傳晉書荀勗傳爲解宅如霆之爲電採京房之說無公之當作譙公引管子形勢篇譙巨者可與遠舉使兩賢見之必粲然曰吾之說固如是惜邵公武子未及此耳

### 魚殮

物產有時而絀今山右得魚甚艱有魚龍鰲鳳之諺春秋時不然也公羊宣六年傳勇士入其大門則無人門焉者入其閭則無

人聞焉者上其堂則無人焉俯而闕其戶方食魚殮勇士曰  
嘻子誠仁人也吾入子之大門則無人焉入子之閭則無人  
焉上子之堂則無人焉是子之易也子爲晉國重卿而食魚  
殮是子之儉也君將使我殺子吾不忍殺子也以是推之疑  
古時汾澮多魚矣

孟堅深於易

班固漢書敘傳多用易義述哀紀云彫落洪支底劇鼎臣大  
過之困實撓實凶述禮樂志云上天下澤春蠶奮作先王觀  
象爰制禮樂述刑法志云靄電皆至天威震耀五刑之作是  
則是敘述五行志云河圖命庖洛書賜禹八卦成列九疇道  
敘述陳勝項籍云上媼下暴惟盜是伐述魏豹田儋韓信云  
枯楊生華曷惟其舊述荆燕吳云雖戒東南終用齊斧述申

屠嘉云蹇蹇帝臣匪躬之故述朱婁叔孫云或哲或謀觀國  
之光述爰盎朝錯云錯之瑣材智小謀大述賈枚鄒路云榮  
如辱如有機有樞述竇田灌韓云安國壯趾王恢兵首述嚴  
朱吾正主父云六世耽耽其欲泚泚音泚師古引易云虎視耽耽其欲泚泚述  
眭孟京房等云占往知來幽贊神明苟非其人道不虛行述  
薛宣朱博云位過厥任鮮終其祿博之翰音鼓妖先作皆用  
周易語也其幽通賦云震鱗縻于夏庭兮帀三正而滅周巽  
羽化于宣宮兮彌五辟而成災又似習聞京氏說者

金不從革

劉宋劉敬叔異苑苻堅建元年中長安樵人于城內見金鼎  
走白豎豎遣載取到化爲銅鼎入門又變成大鐸超案此金  
不從革也五行傳曰好戰攻輕百姓飾城郭侵邊境則金不

從革金失其性而爲災也自王景畧亡鼎鉉非才而堅猶日  
謀南伐師出無功敗不旋踵是其應已

白雉

嘉慶乙丑冬吉林將軍觀明獻白雉一籠表請宣付史館時  
黃尙書鉞直南齋賦白雉來樂府三章

朱寵

阮太傅嵩山三石闕歌嵩岳三闕同高低左右離立八尺齊  
啓母一闕距其北太室峙東少室西誰其建者漢朱寵呂覽  
誰其始者由堂谿漢潁川堂谿典按朱寵字仲威事迹附見後漢書  
鄧騭桓郁張奐傳中與楊震皆郁門人奐其弟子也傳郁歐  
陽尙書以授于奐累官潁川太守大司農順帝初擢太尉錄  
尙書事其上疏追訟鄧騭云伏惟和熹皇后聖善之德爲漢

文母歷世外戚無與爲比當享積善履謙之祐其所陳說皆  
援經義不但精于尚書之學而已蓋亦一代經師

洹子孟姜

肆中盃鬲敦虜匱托居多然如阮氏之齊侯鬬蒼黝而堅篆  
當腹內雖黠賈不能爲也其文有曰齊侯受命天子曰爾期  
璧玉樂舞壺鼎鼓鐘用綴爾大舞鑄爾善鉞用御天子之吏  
洹子孟姜用祈眉壽云云洹桓假借字也太傅歌云雲雷總  
帶交陸離獸面兩耳雙鰓垂篆在腹內難搨槌一十九行列  
銘詞璧玉樂舞鐘鼓司聽命天子曰爾期萬年眉壽爲爾祈  
崔氏至唐大顯

易曰積善之家必有余慶蓋不得于其身者必于其子孫也  
卽以博陵崔氏言之亭伯子玉世濟其賢而讒忌紛如厥身

弗顯後亭伯孫烈爲漢太尉子玉曾孫洪爲晉大司農洪之子孫凡六房除仕于魏周齊者不計唐相元暉損鉉沆出六房敦禮祐甫珙植造出二房日用出三房洪之後凡十相云其它如元綜知溫慎由安潛垂休神慶龜從鄆圓仕至卿相者則漢司隸崔忠之後意忠必厚德人也

崔忠後分三祖雙爲東祖邯爲西祖

寓爲南祖云

### 崔州平

崔烈雖名銅臭州平可云幹蠱

古今姓氏書辨証鈞字州平

草廬人自比

管樂時人未許州平謂爲信然李太白詩云何人先見許但有崔州平其爲詩人推頌如此唐宰相仁師乃烈之十一世孫中書令湜又仁師孫也

### 漢律

漢書功臣表慎陽侯樂買之坐鑄白金棄市程侯商邱成坐  
爲詹事侍祠孝文廟醉歌堂下大不敬自殺山都侯王當坐  
闌入甘泉上林免然則漢律私鑄金銀者死侍祠大不敬者  
當誅離宮禁籞入者皆有罪也淮南說山云殺罷牛可以贖  
良馬之死莫之爲也殺牛必亡之數以必亡贖不必死未能  
行之者矣高誘注云王法禁殺牛民犯禁殺之者誅故曰必  
亡之數然則漢律殺牛大辟也光武建武十一年詔曰天地  
之性人爲貴其殺奴婢不得減罪孔融議馬日磾不宜加禮  
云律與罪人交關三日以上皆應知情蜀志衛繼附傳云法  
禁以異姓爲後以上皆漢律其嚴如是然科條雖峻究多忠  
厚之風應死罪囚在獄自殺吏無譴責後漢書吳祐傳安朝  
正男子毋正長事朝  
廷遇有大事掾屬皆許陳奏後漢書西南夷傳靈帝熹平  
五年諸夷反叛執太守雍陟遣



御史中丞朱龜討之不能克朝議以為郡在邊外蠻夷喜叛  
勞師遠役不如棄之太尉掾巴郡李禺建策討伐乃拜禺益  
州太守其它  
類此尚多  
守令薦士不拘流品如李善本李元家蒼頭鍾  
人見善本傳又將作大匠公孫志節之蒼  
頭地餘後亦仕至蒼梧太守見風俗通  
棺周禮小行人注鄭司農云賻補之謂賻喪家補  
助其不足也若今時一室二尸則官與之棺也此又後世  
之所不及者已

### 督

後漢書郭躬傳軍征校尉一統于督注督謂大將三國時吳

蜀置督甚多蜀有門下督馬忠傳殿中督張通傳中部督典宿

衛兵向寵傳吳則周瑜程普為左右部督孫皎傳甘甯前部督

凌統右部督陸凱巴邱督陸式柴桑督蔣欽濡須督虞授廣

州督魯淑夏口督武昌督肅之遺腹子附肅傳孫鄰繞帳督後為夏口

沔中督孫貴傳步闡西陵督召為繞帳督蔣欽譽徐盛云一好

萬人督也其時又稱大督見孫皎傳

老子

殷仲堪云三日不讀道德經竟舌本木強按歷代注老子者漢河上公母邱望之嚴遵王弼鍾會孫登袁真盧景裕鳩摩羅什陶隱居唐明皇宋徽宗呂大臨葉夢得劉涇呂惠卿王安石王雱陸佃蘇子由此外不可枚舉道藏別有老子西升經老子存一經老子戒經老子脩身經老子中經老子鎮元靈經老子青囊經尹喜老君內傳宣虞老子出塞記梁簡文老子總記又有老子化胡經老君家令老子內觀經老子五禽六氣訣等書皆托名柱下非出于伯陽也

怨

揚子雲逐貧賦云三省吾身謂予無訾處君之家福祿如山

忘我大德思我小怨怨字讀平聲與山叶韻禮儒行篇儒有  
內稱不辟親外舉不辟怨釋文怨旋元反亦讀平聲與親字  
叶也

### 龜屋

放翁詩鬻樽恰受三升醞龜屋新裁二寸冠自注鬻樽卽皮  
襲美所云訶陵樽也某近以龜壳作冠高二寸許

### 頭責子羽

晉張敏頭責子羽文云太原溫長仁潁川荀景伯范陽張茂  
先上郡劉文生南陽鄒潤甫河南鄭冽余友有秦生者雖有  
姊夫之尊少而狎之同時昵好張荀之徒繼踵登朝而此賢  
身處陋巷屢沽而無善賈爲之慨然又恠諸賢身已旣在位  
曾無伐木嚶鳴之聲又無王貢彈冠之義故因秦生容貌之

盛爲頭責之文以戲之並嘲六子責子羽曰吾託爲子頭萬有餘日矣大塊稟我以精造我以形我爲子時髮膚置鼻耳安鬚眉插牙齒眸子摘光雙顴隆起每至出入人間遨遊市里行者辟易坐者竦跽如此者故我形之足偉也子冠冕弗戴金銀弗佩旨味弗嘗食粟茹菜子遇我如讐我視子如仇居嘗不樂兩者俱憂何其鄙哉子欲爲仁賢耶當如皋陶后稷巫咸伊陟保乂王家永見封殖子欲爲名高耶當如許由子臧卞隨務光洗耳逃祿千載流芳子欲爲遊說耶則當如陳軫蒯通陸生鄧公轉禍爲福含詞從容子欲爲恬淡耶則當如老聃之守一莊周之自逸廓然離俗志凌雲日子欲爲隱遯耶則當如榮期之帶索漁父之澹澗栖遲神邱垂餌巨壑今子上不希道德中不效儒墨塊然窮賤守此愚惑察子

之情觀子之志退不能爲處士進無望乎三事而徒玩日勞形習爲常人之所喜對曰吾以大幸爲子所寄今子欲使吾爲忠耶則當如子胥屈平欲使吾爲信耶則當殺身而成名欲使吾爲介節耶則赴水火以全貞此四者人之所忌故吾不敢造意頭曰吾欲教爾以養性誨爾以優游而與蟣蝨同性不聽我謀悲哉俱御人體而獨爲子頭且擬人其倫諭子儕偶子曾不如太原溫融潁川荀禹范陽張華上郡劉許南陽鄒湛河南鄭誦此數子者或蹇吃無宮商或阨陋希言語或淹伊多恣態或驛騃少智諍或口如含膠飴或頭如巾齏杵而猶以文彩可觀意思詳序攀龍附鳳並登天府豈若夫子徒令唇口腐爛手足沾濡哉居有事之世而恥爲權謀譬猶鑿地抱甕難以求富嗟乎子羽何異牢檻之熊深筭之虎

石間餓蟹竈中之鼠事力雖多而見功甚少宜其蹉跎剪燧  
到老無所希也

三國志裴注畧  
引數語非全文

### 朱庫

雲笈七籤朱庫者不知何許人也忽云應得仙與親友別云  
當有迎者須臾有兩黃鶴下庭中庫便度世又有三黃鶴相  
隨飛向東郭外成三黃衣道士攜手東行則黃鶴仙人當是  
朱庫而聞伯里黃鶴樓記引圖經云費禕登仙嘗駕黃鶴返  
憩於此遂以名樓此費禕爲蜀之費禕乎又一禕乎蓋不可  
考其謂爲荀瓌者恐非述異記云荀瓌憩江夏黃鶴樓上有  
物飄然降自雲漢乃駕鶴之賓也則非瓌明甚

### 朱鷺

南史劉遵傳皇太子令云吾昔在漢南連翩書記及忝朱方

從容坐首鵠舟乍動朱鷺徐鳴未嘗一日而不追隨一時而不會遇則竟以朱鷺代鼓用矣

褐

褐亦畫中一色輟耕錄載王思善采繪法有艾褐茶褐檀褐鷹背褐珠子褐藕絲褐麝香褐葱白褐棠梨褐鼠毛褐蒲桃褐丁香褐等色方岳詩野服染成駝樣褐山花開到雁來紅褐字正與紅字對耳

須知

今世官吏赴任胥徒上所辦事宜謂之須知古已有之宋人有北鄙須知解鹽須知池州永豐錢監須知治圃須知等編

戒石

戒石碑采孟昶爾俸爾祿十六字各府州縣悉立之聞康熙

中廬陵縣令陸在新晨起設香案令人誦此四句跪而聽焉  
亦近于沽譽矣

### 交趾

吳黃武中雖定交南迨孫休使察戰調孔爵大豬交趾遂反  
屬晉毛炅等守之孫皓遣監軍虞汜威南將軍薛珣蒼梧太  
守陶璜等分道往擊建衡三年汜璜始攻破之晉書吾彥傳  
云將軍薛珣仗節南征軍容甚盛彥觀之慨然而歎有善相  
者劉札謂之曰以君之相後當至此不足慕也想見當日軍  
聲之壯唐宋以降中國士大夫貌交土如彈丸或致討僅偏  
師或擇帥非上將遂使日南諸郡淪爲左衽惜哉

### 龍王

梁武帝斷酒肉文云五方龍王娑竭龍王阿耨龍王難陀龍



王跋難陀龍王伊那滿龍王如是一切菩薩龍王亦應徧滿  
在此又佛本行經云時難陀跋難陀二大龍王身繞須彌周  
圍七匝山動雲布以尾打大海浪冠須彌則五龍王中又以  
此二龍王爲巨

### 浮虛山記

鄧光薦浮虛山記凡形於太虛皆浮也地在中故地有四  
游水包天外故天曰六幕人于其間蚊蚋其起滅蜉蝣其生  
死也數語可謂名言

### 陳阿平

羅浮志載陳阿平詩數首雅近松陵筆意朱明洞云洞天居  
上真朱明乃其七天地自內生下湧月與日左右列璇房東  
西盡瑤室四時無冬春萬劫若倏忽元化此根柢眾靈所駢

集世人本醯雞所見物中物那知蓬萊宮不自石壁入大塊  
在括囊真氣自噓吸偶遇餐霞人相從守吾一華首臺云神  
僧駐錫時天人來五百華冠何葳蕤列坐在盤石爾來二千  
年復得建法席創之自天公塵公繼經畫雙溪夾寺流一逕  
穿雲直危磴時斷續懸厓或崩拆松門逐地成石扇自天闢  
猶狎獅象形屈曲龍蛇迹寒花散石牀靈藥啗山屐宴坐合  
掌巖恍然悟吾昔黃龍洞云清曉騎黃龍下瞰雙瀑布天風  
吹怒濤飛落西山去觸石犇厓雷一往不可禦人生亦有初  
我欲求其故無形天地始有形萬物母訪舊矚天華荒烟滿  
中路水簾洞云昔持九節杖三度登羅浮不用羽翼生飛上  
二石樓水簾何玲瓏青天垂玉鈎長嘯瑤石臺西望崑崙邱  
萬里止一氣沆漭空雲流常恐遂冲舉一往不可留

黃石公

兵書多托名黃石公不但素書而已另有黃石公兵書黃石公祕經黃石公記黃石公五壘圖黃石公北斗三奇法黃石公陰謀行軍祕法等書

團營

隋之騎兵十隊爲一團團有偏將唐之府兵三百人爲一團團有校尉

彈子礮

黃巢就戮具有明徵榕堂續錄已爲辯之前年過彈子礮巢賊經過處也虎牙架立蒼翠刺天余感而作歌云猪肝剖破烟蒼蒼蝦蟇金色驅羣狼傳宗時童謠金色蝦蟇爭努眼翻却曹州天下反南從閩徼窺五羊飛丸所竊千軍僵戢戢輪石瀆水陽到今彈迹遙

相望當時賊勢驍敢當奇兵只數沙陀疆絳虹竟天起西方

倏見黃腰升御牀可憐盧瑑與崔沆一一垂頭膏劍鉞瑑瑑皆幸

相見戮英江蕞爾雖炎荒破賊尙有夫人槍謂寨將虞夫人

我來弔古增彷徨危境業已一再嘗竇州隅負何陸梁盜魁

幸戮南興王陳金缸踞信宜僭稱南興王旁屬十數梅州倖

陷尤披猖大憝有如金統狂千廐萬隄劄羊腸喜傳捷報來

程鄉汪海洋陷嘉應適余守潮州飭豐順知縣勿勿瘦馬馱

歸裝絕口不言戎事忙夢中鳳水與高涼厯厯猶如眉睫旁

從來劇賊皆誅亡豈得逃禪雪竇深山藏

### 荀子成相篇

請成相道聖王堯舜尙賢身辭讓許由善卷重義輕利行顯  
明堯讓賢以爲民汜利兼愛德施均辨治上下貴賤有等明

君臣堯授能舜遇時尙賢推德天下治雖有賢聖適不遇世孰知之堯不德舜不辭妻以二女任以事大人哉舜南面而立萬物備舜授禹以天下尙得推賢不失序外不避仇內不阿親賢者予禹勞心力堯有德干戈不用三苗服舉舜眀畝任之天下身休息得后稷五穀殖穰爲樂正鳥獸服契爲司徒民知孝弟尊有德禹有功抑下鴻辟除民害逐共工北決九河通十二渚疏三江禹傳土平天下躬親爲民行勞苦得益皋陶橫革直成爲輔契立王生昭明居于砥石遷于商十有四世乃有天乙是成湯天乙湯論舉當身讓卞隨舉牟光道古聖賢基必張願陳辭世亂惡善不此治隱諱疾賢良由姦詐鮮無災患難哉阪爲先聖知不用愚者謀前車已覆後未知更何覺時不覺悟不知苦迷惑失指易上下中不上達

蒙揜耳目塞門戶門戶塞大迷惑悖亂昏莫不終極是非反  
易比周欺主惡正直正直惡心無度邪枉辟回失道途已無  
郵人我獨自美豈獨無故不知戒後必有恨後遂過不宥悔  
讒夫多進反覆言語生詐態人之態不如備爭寵嫉賢利惡  
忌妬功毀賢下歛黨與上蔽匿上壅蔽失輔執任用讒夫不  
能制孰公長父之難厲王流于彘周幽厲所以敗不聽規諫  
忠是害嗟我何人獨不遇時當亂世欲衷對言不從恐爲子  
胥身離凶進諫不聽到而獨鹿棄之江觀往事以自戒治亂  
是非亦可識託於成相以喻意

請成相世之殃愚闇愚闇墮賢良人主無賢如瞽無相何俛  
俛請布基慎聖人愚而自專事不治主忌苟勝羣臣莫諫必  
逢災論臣過反其施尊主安國尙賢義拒諫飾非愚而上同

國必禍曷謂罷國多私比周還主黨與施遠賢近讒忠臣蔽  
塞主勢移曷謂賢明君臣上能尊主愛下民主誠聽之天下  
爲一海內賓主之孽讒人達賢能遁逃國乃厯愚以重愚闇  
以重闇成爲桀世之災妒賢能飛廉知政任惡來卑其志意  
大其園囿高其臺武王怒師牧野紂卒易鄉啓乃下武王善  
之封之於宋立其祖世之衰讒人歸比干見刳箕子累武王  
誅之呂尙招麾殷民懷世之禍惡賢士子胥見殺百里徙穆  
公任之強配五伯六卿施世之愚惡大儒逆斥不通孔子拘  
展禽三紂春申道綴基畢輸請牧基賢者思堯在萬世如見  
之讒人罔極險陂傾側此之疑基必施辨賢罷文武之道同  
伏戲由之者治不由者亂何疑爲凡成相辨法方至治之極  
復後王慎墨季惠百家之說誠不詳治復一修之吉君子執

之心如結眾人貳之讒夫弃之形是詰水至平端不傾心術  
如此象聖人而有執直而用拙必參天世無王窮賢良暴人  
芻豢仁人糟糠禮樂滅息聖人隱伏墨術行治之經禮與刑  
君子以修百姓甯明德慎罰國家既治四海平治之志後執  
富君子誠之好以待處之敦固有深藏之能遠思思乃精志  
之榮好而壹之神以成精神相反一而不貳爲聖人治之道  
美不老君子由之倣以好下以教誨子弟上以事祖考成相  
竭辭不歷君子道之順以達宗其賢良辨其殃孽成相之  
義非謂成功在相也禮治亂以相相乃樂器請成相言請奏  
此曲也其音節如後世彈詞抑揚反側大招天問之外別成  
一格荀子世少佳本且卽有其書者亦多不讀因爲錄出以  
見周秦之際文體之變有如是者